

Waor of niet waor?


Dick van Bloemendaal; *tekening: Gerard Schut*

Hele kleine verhaoltsjes die soms warkeluk gebeurd bin en verhaoltsjes die ik uut m'n duum 'ezeugen het. Veur julie een vraag, mar veur mien een weet, welke wel of niet waor bin.

Landverraoier

In de oorlog woende dur bie ons an de weg un beetje un vreemd echtpaar, zie was lang en schraoi en hie was un klein dik propje. Daorum han ze de binaam van anderhalve cent. Dat zu dur zo uutzagen vunnen we niet arg, daar kossen ze zelf ok niks an doen, mar umdat ze bie de N.S.B. waren, dus landverraoiers, werden ze in de buurt an dur lot over'eleuten en niemand had eigeluk contact mit ze. Ze woenden in un klein leegachtig huusje en um de tuin stung un hoge heeg. Hie stung vaak in zun tuin achter de heeg te gloepen wat of dur deur de bureen uu t 'espoekt werd en as ut iets was wat niet naor zun zin was verraoid hie ut an de burgemeester, dat was in die tied ok un N.S.B.mannetje. Iedereen in de buurt had de pest an um en zou um ut liefst us un keer goed op zun falie willen geven, mar geen mens dorst ut an um ut te doen.

Op un winteravond toen ut al duuster was liepen mun kameraod en ik op straot en we verveelden ons un beetje tot we plotseling op ut idee kwammen um die landverraoier



te gaon narren. We zagen un leer an de ziekant van ut huus an un

paor haken hangen en toen was ut idee geboren. We zouwen mit de leer naor de schoorsteen klimmen en un tegel op de schoorsteen neerliggen zodat dur geen trek meer in de kachel kwam.

Bie ons achter de schuur stung un stapeltje ouwe tegels en daor hen we dur een van mee'enuemen. De luuken waren dicht, dus kossen ze ons niet zien en toen hen we de leer tegen ut huus 'ezet en bin ik mit de tegel nor boven 'eklummen en het die op ut schoorsteengat 'eleid. Vlug weer naor benee, de leer weer op de haken 'ehungen en toen op veilige afstand kieken wat of dur gebeuren zou. In de kortste keren kwammen ze allebei hoestend en pruustend nor buuten runnen, naodat ze alle deuren, luuken en ramen los han 'ezet, de rook kwam overal uut naor buuten. Toen ut hout in de kachel uut'ebrand was hield ut roken ok op en gingen ze weer naor binnen.

De volgende margen is hie naor de smid 'egaon en die kwam in de loop van de margen bie ze naor de kachel kieken. Hie kos niks an de kachel vienden en mit un stuk krant dat hie in brand stak kwam hie dur achter dat dur geen trek in de schoorsteen zat. Mit un lang touw waor onderan un borstel en un koegel zaten is hie mit de leer naor boven 'eklummen um de schoorsteen te scheumen umdat hie docht dat die verstopt zou wezen deur roetanslag. Toen hie bovenan kwam zag hie wat de warkeluke reden was, hie het de tegel dur of 'ehaold en de schoorsteen 'eveegd. Nooit het de smid dur toen iets van tegen iemand 'ezeid umdat hie dan wel wist dat ur naorigheid van zou kommen. Nao de oorlog hen we ut verhaol van hum 'ehurd. Nao de oorlog is die landverraoier op'epakt en veroordeeld vur zun daoden, toen hie laoter weer vriekwam bin ze verhuusd naor Velp en hen we ze gelukkig nooit weer terug'ezien.

+++